

22/10/2001

Persatuan sokong duti import rokok dinaikkan

LUMUT, Ahad - Persatuan Anti Merokok Malaysia (PAMA) menyambut baik langkah kerajaan menaikkan duti import dan duti eksais rokok dalam usaha mengurangkan jumlah perokok negara ini.

Pengerusinya, Koh Eng Bing, berkata langkah itu diharap memberi kesedaran kepada perokok untuk mengurangkan tabiat buruk itu dan seterusnya meninggalkannya.

Katanya, kenaikan duti import rokok daripada RM180 kepada RM216 sekilogram dan duti eksais daripada RM40 kepada RM48 sekilogram akan membantu mencapai matlamat itu.

"Kita menyambut baik langkah kerajaan itu dalam usahanya mengurangkan amalan merokok di negara ini.

"Langkah ini dilihat sebagai mencapai matlamat diperjuangkan persatuan ini," katanya.

Kelmarin, Perdana Menteri yang juga Menteri Kewangan, Datuk Seri Dr Mahathir Mohamad, membentangkan Belanjawan 2002 yang mengumumkan kenaikan duti import dan duti eksais rokok.

Koh berkata, kerajaan juga digesa supaya terus mengambil langkah meningkatkan duti import dan duti eksais rokok pada masa depan bagi memastikan matlamat masyarakat tanpa rokok dicapai.

(END)